



22. september 2016

UKA2016/22

Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx xx 2016-imeersoq. (Soraarnerussutisiaqar-nissaq siunertaralugu ileqqaakkat, kinguaariinnut tullernut nikisitsinermi aningaasanut killi-liussamik qaffaaneq)

(Aningaasaqarnermut Aatsitassanullu Naalakkersuisoq)

Siumumi pingaartutut isigaarput akileraarnermi aaqqissuussinerup naleqqussartuarneqarnissaa taamaattumillu Naalakkersuisut inatsisartut inatsisaata allangortinneqarnissaanik siunnersuutaat imatut oqaaseqarfigissavarput.

Naalakkersuisut saqqummiussaminni oqariartuutigaat inuussutissarsiutitigut siuarsaaniarnerminni politikkiminnut ilaasutut taamatuttaarlu soraarnerussutisiaqarnissaq pillugu ineriartortitsinermut ilaasutut isigalugu, siunnersuutip matuma soraarnerussutisiaqarnissaq siunertaralugu aningaaserivinni, kalaallit nunaanni angerlarsimaffeqartuni imaluunniit kalaallit nunaanni ingerlatsisuni ileqqaarsinnaalernissaq siunnersuutip piviusunngortissagaa, tamannalu Siumumiit tamakkiisumik ilalerparput. Aamma inatsisip allangortinneqarnera immikkoortumut 19-imut attuumassuteqartutut isigineqarpoq taamaattumillu allannguinnissaq pisariaqartoq Siumumi taperserparput.

Siumumi maluginiarparput tusarniarneqartut oqaaseqaateqarnerminni ilaatigut soraarnerussutisiaqarnermut tunngasut soraarnerussutisiaqarnissamut pinngitsoorani ileqqaartussaataaneq pillugu inatsiseqarneq ilanngullugu suliassatut annertuutut isigimmassuk, pingaartillugulu piareersarlarnissamillu pingaartitsillutik malitsigisassaanik sunniutissat paasilluarnerunissaat pisariaqartutut isigimmatigit. Tamanna tunngavigalugu (Grønlandsbankenip) aamma (GE-p) oqaaseqaateqarnerminni inassutigisaat ilisimasaqarluartunik inuttalimmik ataatsimiitsitaliortoqassasoq, soraarnerussutisianut tungasunik aamma soraarnerussutisiaqarnissamut pinngitsoorani ileqqartussaaneq taamatullu soraarnerussutisiaqarnissamut aningaaserivinni ileqqarneq pillugit inatsisiliarineqartunik, kingunerisassaanik inatsisinullu allanut attuumassuteqarnerannik qulaajaasinnaasumik inassuteqarnerat.

Siumumiit Naalakkersuisunut kaammattuutigissavarput kattuffiit tusarniarneqarnerminni oqaaseqaatigisaat ilanngullugit nalilersuinermi tusaaniarneqaaqqullugit. Siumumiit isertitanik akileraarutit pillugit inatsisartut inatsisaata allangortinneqarnera pillugu inatsisartut inatsisaat, nr. xx,xx.xx 2016-imeersoq siullermeerneqarnerani taamatut oqaaseqarluta aappassaaneerneqartinnani Ataatsimiititaliami susassaqartumi suliarineqarnissaa innersuupparput.

Jens Immanuelson
Siumut